

TESTAMENT DE L'OM SALVARECH 2025

Cu-cu cu-cu cu-cu – se sent cantà dai nif
na sonada inte i bosch – che dà ago a chi che scrif

Cra crac cra crac – inte le poce dei Talas noda la vita
sto gran freme – el dà penta anca a chesta scritta

L'è i prà che muda el color – i galuz che fà la trombata
tut el mondo se parecia – e a sto Om elo che che ghe speta?

Na gran peada inte el cul – parchè pena che mostre el nas
i me ciapa e i me imbeleta – e i me cava via la pas

Par quasi che la dent – no la ebe nia de meio da trà
la rit e la bat le man – co el fuoch el taca a me despoia

Svergognati! – Meteve na man su la cosienza
o elo i vosi sorisi – solche na magra aparenza?

Che sarae stat l'ultima – avè imprometù la outa pasada
e invezze anca sto an – sta crous su la scheina l'è cargada

E sone chi po mi – per esimeme da sta lustra prestazion?
L'è l'unico modo per tirà le recie – senza riscia na sanzion!

Me son sentà do inte al Gal – a badà co levea el sol
e nia me son rendù cont – che ognun el fà chel che el vol

Se pol anca incucase – a olè vardà pì da lonz
proà a fà en pensier pì grant – ma nia no te ponz

Sion proprio da La Val – picioi, torondi e desavidi
ma elo suces che mo – somea che siede sparidi

Ve muoveo inte ste vile – che l'è tut imbalsamà
o na levina (de zorda) – ve ala smardegà?

Nia no l'è e nia no vien fat – elo chesto el nuof mot?
Tic-tec tic-tec – spetone che na bomba la fae el bot?

Me par che de sti tempi – sie meio stusase su sti discorsi
che no ne toche tornà indrio – a faghe la pel anca ai orsi

Parchè no se capis no – chel che pensa sto Merican strusia
e cotant no la va meio – con Vladimiro da la freida Rusia

Ve la dighe fora scieta – sion in balia de doi pantalo
sol parchèchè i à i schei – i se cret del mondo i paroi

E sta pore società – la fa fadiga a rivà a la fin del mes
a forza de mete su dazi – se caton picadi su come pes!

E se dovesse tornà i sciop in man – elo i nos doven che ne defende?
Me i vedemi in guera – che ghe fa mal se la caca toca pende...

E ancu per daver – me sentarae anca manco revers
anca se la direzion giusta – somea se sie pers.

Sto luni elo suziedu che po' – che à fermà el mondo intiero
à serà i oci en spirito grant – che el s'à dimostrà en om sinziero

No ghe interesea raze, colori – chel che a un ghe pias
fondamental per el Papa – l'era che inte i cuor fusesse la pas.

Proprio da chesto voi partì – prim che el me ese el arde
parchè recordeve che anca se scondù – tut d'intorn mi varde

Sgolaré fin su in ziel – e diventarè bampe, fiadigole e bronze
ma en puoche de porcade che avè fat – ades ben ve le conze

Voi credarè che sie ignorante – ma mi liede semper el gasetin
e da l'an pasà – ghe stae drio a le nuove anca sul telefonin

Chel che pì me pias – l'è ciapà el boletin a Nadal
ma da sta outa – è bù l'impresion de avè liet mal...

L'era su articoli e scione – de en bon toc prima
me sone pers en an – da l'insuda a la fardima?

Erelo puoche robe da contà – ma ancora en cin che i spetea
Anca i coscritti su la foto – quasi in pension i ndea!!

E “Se te se da La Val...” – saraelo giust che po sta mesa?
N'auter luoch onde contasele – o mandase a remengo in presa?

È liet de chi fatti di cronaca neigra – “Sottratti dipinti nei capitelli”
l'è restà sbasì anca San Ferm – co l s'a vist da la Sciarelli

Me son fat marevea granda – de chel che è suziedù inte in Fres
ma nisun l'era ndat trot – la restaurazion l'è durada n'an e en mes!

La ghe è ndata pedo – a la Madona del Col Menadar
no la à fat in temp a poiase – che i là trafugada al mar

E medi de La Val – no i savea gnaca che i avea fat sto monumento
Ma pareva che i avese portà via la zima – che i avese robà el Sacramento

At che solche en pore diaol – el pol pensà de fà in alegreza
anca se i crep i è de tuti – fala che na Madona de pì de na careza?

Mi me par che avone smarì la busola – fon fadiga a ndà via dret
tanto che anca ai santissimi – semper manco l'è che ghe cret!

Ma proon mo a fa doi barch indrio – a chel che ve avè cridà
giusta da capì chel che è stat fat – e se valc se à mudà

Me cave via el riguardo – e tende subito en bel agguato
fora inte Consiglio comunal – elo pasà en carro armato?

I è tuti spasemadi – musì longhi che toca dobas
Su animo consiglieri – che chi che fa pì paura l'è chi che tas...

Aveo che in programma – tireo fora en calche carico
o ne aseo tuti sui spin – per el “nia” che se à fat cronico?

Bademo l'an pasà – l'è stat fat un unico laoro de riguardo
drezà el cartel LA VAL – chesto sì che l'è un lodevole traguardo

Proe a ve spizigotà – parché cheste sì che l'è burte cartoline...
le piante sbrasade a banda strada – rivarale a rodolon inte le Valine?

De tuti sti consigli de orden – così baldanzous m'ere fin ciapà
oleo vede che grandi mestier – en tacon qua e na comedada de là?

E invezze l'Aministrazion immobile – no la tira gnanca en pet
i'avarae da stusà le luci inte i ufizi – e la not ndà direti su let

Magari se se deseida pì pausadi – senza i cavei pieni de bozole
se ciapa pì olentieri el ascensor – se i scalin toca fali co le crozole

Torne a dighelo pì sciet – la dent no la ghen inpol pì, la è stufa!
Aministratori avè da ndaghe incontro – e no sta scondudi a fa la mufa!

Ah pore noiauter e pore Comun – in che man che sion capitadi
no se pol gnanca ciamali – parché no se i cognes sti deputadi!

N'aultra menestra straboida – che ogni an se torna a scaudà
sta question dei parcheggi nuovi – la oleo proà a comedà?

Per fortuna che no è machine o patentì – senò fè come in periferia?
Se me toca spetà el postegio – altro che lat ai denoci me vegnia

L'è belche da en toc – che i ne dis che i à in man i progetti
Aveo vist fursi valc – o che sie stat mes do doi paletti?

No ston a catà fora el Zentro storico – e i gran laori sui pont
ma cavonse en picciol saset – de la Foca co elo che fon i cont?

Vardè che la dent la à ciot su schei – n'auter merdon oleo pestà?
No se à pì savù nia – elo onde che el cantier el se à inbugà?

Squerdarè anca chesta sot al zender – spetarè n'otra legislazion
ma a forza de indusià – no ve die a chel che m'è vengù el duron!

A proposito de novità e cantieri – che proprio no me pias
è vist zerte robe spontà come fonghe – ma elo chi che tas?

Mi capise-mi che sion drio – che balegon inte i tempi moderni
Ma i disegni de le case – no i li fa pì tirando linee sui quaderni?

I à fat su de chele caserme – le somea rivade da chissà che posti
Ma avone capì che sion a La Val – e in pì inte le Base, po' osti!!

Mudon en cin el discorso – parché l'aria s'è fat pesante...
spalancon porte e fenestre – e ndon su l'emozionante

Ma chi che comanda – ali capì che sta n'atimo a ndà tut in malora?
E che se no fusese le associazioi – sarae tut scur e no se vedarae pì fora?

La forza che muof el nos paes – l'è el volontariato che fa tut per nia
Manco mal che i è, e i è tanti! – Senò se podarae sonà l'agonia.

Proprio venendo dai Zernidor – me son dit “saralo che tut chel dawai?”
È spizà le rece via per vila – parchè do per la bàsa no se ghen vet mai

Dent che va e che vien – i à vèrt stale e anca talvè
incucarali l'ecocentro – dopo tut sto gran sfrazà?

A giudicà dal estro – che i à tuti per sto parecio
deventarà nà nuova usanza – tirà fora valc de vecio

Me à ocorù calche dì – per capì le vere intenzioi
co è vist comparì foto vecie – in gran mostra sui tabeloi

"La Val da incornisà" – ogni an se la se tramuda de frazion
e dopo Conaia e Fades – da staouta ghe à tocà a Gaidon!

Che emozion rivede i musì – e i luoch de n'atra La Val
pupi che ades è noni – e amede de na outa col garmal!

Pensando a chi tempi – me vien en cin de nostalgia
ala fin se avea tut instes – anca se no se avea nia...

Bastea cosita puoch – dòì cantade in piazza e n orghenet
a fa valch al dì da ancui – scartafazi e burocrazia, te fa pel su dret

Però però sta manifestazion – la à da avè tocà le corde giuste
me par de avè senti – che a Fades le burele sie belche lustre

Dopo la prima outa – i à ciapà gusto de avè la piazza piena
fin en concerto lirico – i è stadi boni de organizà de gran lena!

L'era tuti i lampioi coloradi – me pareva de ese in Paradis
cufà drio el talvè dei Nele – è serà i oci e me son insognà fis...

Toca proprio dì che la è stada intivada – i ve à dat na desbramida
basta puoch per daghe coraio a la dent – no la è mia insemenida!

E de la 16 COMUNI – i e restadi tuti pì che contenti
fin da fora confin – i ciapà i lustri e complimenti!!

Se el savea che erion tepe – a siegà su per le rive
ma nisun se à mai pensà – che su l'erba erion boni anca de scrive!

Se fa semper la fegura – dei retrogradi indriòt
ma staouta a se ricrede – l’è stat fin i taloch!

E Pro Loco e Sci Club che valenti – i e riusidi a ve binà auna
co sta impresa de volontari – se riusia a ciapà anca la luna!

Sbase subito le ale – che i dis che l’Om Salvarech el è de parte
E grazie se ghe la sone – l’è i unici che mena le arte!!

A proposito de strumentazoi – e acquisti da gran siori
fora inte Comun – i à da avè catà el sachet dei bori

I à comprà en trator nuof – che el è grant come en trili
se no te te trà in banda – el te slisa come na carta da mili!

Ma me vien el dubbio – lo ceneli inte garas o lo doprarali onde?
Regonarali valc, tramudarali roba – o ndarali a fa i sonde?

Parchè, e l’è semper chela, – l’è meio che ve netede le rece
siè pieni de artefazi nuovi – ma d’intorn l’è solche robe vece

E giusta de veciarie – e de grandi opere impiantade
cande elo che la strada de Fres - la vedarà le sponde montade?

Pasà el stramanon del Vaia – l’era subito el cantier vert
mi son stat na stemana – a proà a rivà a Garlet

Con sti scavi enormi, tubazioi – palta fin ai denoci e ai calcagn
oleo vede che i à in programma – el tunnel per rivà ai zoldagn!

À da ese come n’autostrada – quanti ani elo che i la regona?
A forza de dilo e stradilo – i me ciaparà per mona!

Olè ghe scrive fin a Zaia – per via de la barufa ambientalista...
magari i avea interes – a tramudà qua bob e anca la pista!

Se sarae territorio olimpico – parché me par che gnanca l’Agordina
la sie stata ciapada in considerazion – come strada per Milano-Cortina

Me parelo solche a mi – che sion semper en cin desmentegadi
ma chi elo che à in man la maniera – de fa sì che sione vardadi?

No l’è pì no le grandi menti – come Pra, Manfroi e Tama
che tut chel che ndea in do – i proea a tiralo su, come brama

Sion là impigotadi – che dison “ne casca i sas su la testa”
Ma alo da scampà el mort – prim che sciope na protesta?

Ma no capise parchè – co l’è ora de fa valè i propri diriti
ve scampa via le parole – e sbereghè come gnei miti

Dai, su! Sion fioi dei crep – fè sentì che avon forza e voia
no stè fame venì el fot – che me vegnarae de dave co la stoia!

Ades parlon anca de le squaze ni – parchè me vien el rebalton
prim de tut la luce in Ecocentro – sione noi che la pagon?

Ma ve sieo inascorti – che la è impizada not e dì?
Elo en nuof sistema de la Valpe – se bina le batarie de pì?

Seconda roba che ve die – à da ese dent senza zervel
pena che ve catè fora trui – l'è pì sloz del caoz del porzel

Ma elo chi sti schifosi – che impienis le curve del Duran?
Da quante porcarie che i asa in giro – i à da ese sol pore can

E no parle de animiai – che balega a quattro zate
Ma de omi e femene – che buta via boze, materaz e zavate!

E co l'era sta fardima – intant che strachee le piazze
en dì è batù inte – inte na combricola de bociaze

Olee quasi coreghe drio – pensè che i ndese a fà matez
me son metù a spiotali – scondù drio en pez...

E sì i è visti con sachet, pinze – e le man piene de guanti
I era na destrigada – i sarà stati mi no sé quanti

I continuea a cantasela – e i ciolea su botiglie, sachet e na biro
tute le squazarie che calchiun auter – avea asà in giro.

Alora è ousà domandà – a un de chi maestri che li ociolea
“Sieo drio fa che po’?” – conteme che son pien de marevea

“Sion drio a ghe insegnà – a chi che sarà grandi en doman
che se no ghe ston drio a la nosa tera – faron solche en gran dan!”

Ben, son restà de stuc – no savè gnanca pì chel che dì
da na banda ere pien de orgoglio – ma da chel'autra en cin avilì

L'unica soluzion – l'è ciapà inte da chi che sarà dopo de noi
e insegnaghe l'union e la cura del territorio – per no fenì dasoi

Aveo vist che bel su in Col – anca sto an l'era piena la piazza
bravi tuti chi che se pensa de mi – anca la testa m'avè fat paonaza

Ma ades onde sione rivadi? – Ah sì, toca la part pì bela
Anca sto an no le è risparmiade – ve è dat na bona minela.

Chesta l'è la vita che è – me incuriosis chel che fa la dent
Manco mal che zerte robe – el me le fa rivà qua via el vent

È molà instes en puochi de petardi – me aviè proprio stufà
Ve meritariè che NIA ve asese – parchè NIA avè olù fa!

E se anca calchidun – el se sentirà ofeso en puoch
Recordeve: mi, le ciacole e i pensier – i va direti inte fuoch.